

საიუბილეო კომიტეტის

შეგიგანგებულა

4781
2

===== ელექტროგრაფი

===== მ. ლ. კიკნაძისა

===== ტფილისი

ნიკოლოზის ქ. № 6.

===== 1908

საქართველო

საიუბილეო

კრებული

1908

33

11

12

13

15

17

19

20

23

25

26

29

30

32

33


შ ი ნ ა ა რ ს ი :

83.

1	სამშობლოებადმი — ია ეკლაძისა	
	ფშავლის შემოვლილი ლექსი — თ. რაზიკაშვილისა	11
	ლექსი — კორტოხასი	12
4.	ლექსი — დ. თომაშვილისა	13
	აკაკი, გიზარდენ ! — ა. ცაგარლისა	15
6.	აკაკი და «მსოფლიო გოდების» პოეზია — ა. ხახანაშვილისა	17
7.	ლექსი — დუჭუ შეგრელისა	19
8.	ლექსი — ცენტერაძისა	20
9.	ლექსი — ი. ევლოშვილისა	
10.	აკაკი წებუთელი შერთასა სთხვებ — ი. ფანცხავასი	23
11.	ლექსი — ა. შანშიაშვილისა	25
12.	მყინვარი — სვ. ყიფიანისა	26
13	ლექსი — დარჩასი	29
14.	სინათლესკენ — ანასტასია ერისთავ-ხოშტარისი	30
15.	ლექსი — ვ. რუხაძისა	32
16.	ლექსი — შ. ნავთლულელისა	33
17.	ქართული პოეზიის იაღბუნი — ი. გოგებაშვილისა	34

18. მწარე მღვდნება — ს. მერკვილაძისა	40
19. ლექსი — გ. ნუციძისა	45
20. კრიტიკული ესკიზი — ი. გომართელია	46
21. ლექსი — ლ. კატოძისა	48
22. მღვდნება — ივ. ბუჭურაულისა	49
23. პლეტი — შ. მღვიმელისა	52
24. ლექსი — ი. მჭედლოშვილისა	54
25. ლექსი — კ. გულაშვილისა	55
26. გვგასკული ვმევი — იასონ წერეთლისა	56
27. ლექსი — კ. კვინიხიძისა	59
28. ლექსი — კ. მაყაშვილისა	60
29. ექსპროპტი — პასიკო ლორსა	62
30. ლექსი — გიორგი ქიზიყელისა	63





სამშობლოსადმი...



რძნობით აღესილი, ოცნებად გადაქცეული ვზივარ ჩემ მარტო-ხელ ოთახში — შორეულ რუსეთის ერთ-ერთ გადაღუპულ ქალაქში — და გონების თვალით გამოგყურებ შენ, ჩემო პაწია, მაგრამ ტურფა სამშობლოვ!

სევდა მკლავს უშენოს!... შენი მზე ვეღარ მათბობს, ვერ მახალისებს! რომ იცოდეროგორა ცივა აქეთ, როგორი დაბეჩავებულია აქაური ბუნებაც, ცხოვრებაც, ხალხიც!? გავერანებულ ყინვას გაუთოშავს, შეუკრავს, გაუფიცრავს აქაურობა... ვინ, ვინ დაჰკრა პირველად ბარი ამ დამზრალ მხარეს, ვინ ჩაუყარა პირველი საძირკველი აქაურ ძალ-მომრეობას, ხალხთა აქაურ ძალ-მოსილებას?!

— ვინ?

— დროთა ბრუნვამ, ჟამთა ვითარებამ!

ამავე დროთა ბრუნვამ, ამავე ჟამთა ვითარებამ დაგაძაბუნა შენც, ჩემო თვალის სინათლევე, „ცა-ფირიუზ, ხმელეთ-ზურმუხტო, ჩემო სამშობლო მხარე!“... თავ-გზა აგირია, მანდილი მოგხადა, გაუღბობელ ყინულთა გროვისა და გაუვალ ტევრთა შემაყურებელი გაგხადა. შურმა და მტრობამ გული მოგიკლა, ნდობამა და რწმენამ მოგატყუა... ოდესღაც ქედ-მაღალი და შეუპოვარი კაპასი დედინაცვლის ობოლ გერად გადაგაქცია!

შავ და უკულმა ის დღე და საათი!

სისხლისგან დაკლილმა, დამცივებულმა, ჯან-ღონე გამოლეულმა თავი მისდევ შენ მოამაგე კავკასიონის კალთაზე და მიიძინე... მიიძინე სასოწარ-

კვეთილების ძილითა, მიიძინე ისე მკვდრულად, როგორც დაიძინებს ხოლმე ნაცემ-ნაგვემი, უმღვთოდ ნამუშავარი მონა უსახსრობისა — უსიზმროდ, უოცნებოდ!...

ტყვილად მოსჩქეფდენ წყალნი შენნი მთა-კლდეებიდან; ტყვილად მოჰქუხდენ ჩანჩქარები მწვერვალებიდან; ტყვილად ყვაოდენ ველ-მინდორნი ტურფად, სამოდ; ტყვილად დაჰქროდენ ქარნი შენნი აღმა და დაღმა; ტყვილად შფოთავდენ ტყენი შენნი უღრან-უვალნი; ტყვილად გმინავდენ ხე-ხუვები ძაძით მოსილნი!

დაღლილ-დაქანცულს აღარაფერი არ გიფრთხობდა მკვდრულ, მაგარ ძილსა!

— ძლივს არ მოკვდაო! გაიხარეს ყველა იმათ, ვინც შენ სიკვდილს მოელოდა და ფერხული ჩააბეს. დაივიწყეს შენი ამაგი, შენი მასპინძლობა, შენი ადამიანურა და დედაშვილური მოპყრობა. სვავებივით წამოიშალნენ საზღვრებიდან და დაგიწყეს კორტნა, გულ-მკერდის წიწყვნა: აღარ რცხვენოდათ არც შენი ღვაწლ-მოსილი ქაღარისა, აღარც შენი ხავს მოდებულ ციხე-კოშკებისა, აღარც შენი კულტუროსან ტაძარ-გალავნებისა! გაგთელეს, გაგანადგურეს, სახელი შენი ამოშალეს ცოცხალთა წიგნიდან .. თვით შენმა შვილებმაც კი ზურგი გაქციეს და სხვის ბუზმენტებზე გადასცვალეს შენი ამაგი!.. უკეთურნი!!

შენ-კი კვლავ გეძინა! ათასში ერთხელ აღმოგხდებოდა ხოლმე ოხვრა უიმედობისა, კენესა მწუხარებისა, მაგრამ ეს კენესაც აღარავის აღარ ესმოდა!

დამფრთხალნი, დაკნინებულნი შვილნი შენნი სხვის მონობაში, სხვის ვედრებაში ატარებდენ ღღესა და ღამეს და...

სხვა იგივე გვიმღერდა ყალბად, გვართობდა ცბიერის აღერსით... გვათრობდა, გვაბრუებდა...

ვიღუპებოდით! მაგრამ...

მადღმა შენგნით დანათესმა, ნიჰმა შენგნით ძუძუ-ნაწოვნმა, სევდამ

შენგნით განაწონებ? და ბოლმამ შენ გულში დანაგუბებმა წარმოშობა კაცი იგი, რომელმაც ხმა ჰყო ხმითა დიდითა:

— „არ მომკვდარა, მხოლოდ სძინავსო!“ ხმა ესე მოეღო შენ გულ-ჩათბრობილ მთა-ველებს, ატეხილ ქალებს, დასერილ ხევ-ხუეებს და შეირ-ხნენ, შეიშმუშნნენ!

ჩვენ კი გვეუცხოვა .. გაგვეცინა... გაგვიკვირა!... გარეშეთაც სიცი-ლი დაგვაყარეს...

მაშინ კაცი იგი დადნა წმინდა გრძობად, იქცა ტანჯულ გულად თავისის მშობლისა, შედგა ტრფობის მთაზე და მოჰყვა სიმღერას, სიმღერას სევდიანს, ტკბილს, ზე-აღმტაცს, მშობლიურს, დაუსრულებელს ..

სული ჩაედგა შენ ველ-მინდორს, ამეტყველდა შენი, — ჟამთა — სიავის გამო, — ხავს-მოდებული ციხე-კოშკები, მამა-პაპათა აჩრდილებმა დაიწყეს მოთქმა-გოდება ტიალად შენნილ ტაძართა ნანგრევებში...

გული გვიბოვებს ჩვენც ამ ხმებმა!.. შეგვრცხვა ჩვენი მონად ყოფნისა... მოგიახლოვდით, ყური დავუგდეთ შენ მაჯის ცემას...

წინ მოგვიძლოდა კაცი იგი.. შენი მგოსანი!

ვარდ-ზამბახებმა გაულიმეს მღალადებელსა, ყვაილებმა გადაუხსნეს თვისი ლამაზი გულ-მკერდი და უძღვენეს ნექტარი სიცოცხლისა შენდა სამკურნალოდ.

უფრო აღფრთოვანდა მგოსანი! სასიცოცხლოდ რომ მოგაბრუნა, მქუხარე ჰანგებად გადაიქცა! .. გრძნეულის ხელით მან მობოჰა ჩვენი გულის ძაფები, დასწნა და ჩამოქნა ივინი თავისს ჩანგის სიმებად... ჩანგი იგი საწირავად თავს შემოგავლო და თან სიხარულის ცრემლები დაგაფრქვია. ცრემლმან მისმა მოგბანა კრილობანი, სიმღერამან მისმა კვლავ გაგაამაყა, კვლავ თავისუფალი ცხოვრება მოგაწყურა...

დიდება, დიდება თავისუფლებას !!

სიპართლე იმარჯვებს, ბურუსი იფანტება... შენი მგოსანი შარაფანდელით იმოსება!...

აცა! დაფრთხენ, დაიხაფრნენ შენი მტერნი. აქა იქ დარჩენილ წყვილებს-ლა ეფარებიან. ოხ, რა გველურათ ილიმებიან?! მაგრამ ნულარ გეშენის, ჩემო ყველაგ! შენი მზე უკვე ამოდის!

ჩვენ გამოვფხიზლდით, შენც გამოცოცხლდი... ჩვენი ერი ლიტანიობს!!
ვაშა, მამულიშვილებს!!...

ია ეკალაძე



ფშაველის შემოთვლილი



ენაცვლე, ბერო, მინდიავე,
მუხლი გამოგყვა მგლისაო,
გამბედაობა ვეფხვისა,
წოხს ჰვრეტა შავარდნის.ო,
გული კი სიყვარულითა
მგზნებარე ქვეყნისთვისაო!

მარტოკა ჩახველ ომშია,
თან მაღლი ჩაგყვა ღვთისაო,
ჩამოგყვენ ორნი თუ სამნი, —
სურვილი ჰქონდათ ცდისაო,
არ იმჩნევთ მარტო ხელობას —
შუქ გეფინებათ პირსაო;
მაღლა გეჭირათ ალაში,
არ დაგიშვიათ ძირსაო,
ელვის ფრად ამოდიოდა
ხმა თქვენის ფრანგულისაო!

რა უყავ ამახანაგები,

სად დაგრჩნენ ბრძოლის ველზედა?

— მოღალღეობა ომითა

მშობელი ქვეყნის მკერდზედა,

სამუდმო მოსასვენო

ჰპოვეს გმირების გვერდზედა!

თმა-წვერით ვერცხლად ქცეულო,
გვიმღერი განთიადზედა,
ჩვენც შენით მოხიბლულებსა
თვალი გვიჭირავ შენზედა,
ნუ ჩავვიჭრები, მნათობო,
დღეს ნუ შეგვიცვლი ბნელზედა!

ო. რაზაკაშვილი



*
* * *

იბნელები, ვით ლამპარი,
ეკლიან გზას გვინ თებდი.
ძმობასა და ერთობასა

გულ-ახდილად ჰქადაგებდი.

საპირადო უარჰყავი,

შენს სამშობლოს მტლათ დაედე,

მოსარჩლობა დასჯილ ხალხის

თავზე იდევ და გაბედე.

მშიერ-მწყურვალს ხელში კალმით

ლამე ხშირად გითევია,

თავგანწირვით სამშობლოსთვის

ტანჯვა, შრომა გიწვევია.

სოფელმა ვერ მოგისყიდა

ვერც ჩინით და ვერც ფულით.

შენ სამშობლოს სიყვარულმა

გაგიტაცა სულით, გულით!

ენა ბასრი; პირწყლიანი,

მოსაუბრე, ლმობიერი,

უბოროტო წმინდა აზრის

გამომთქმელი, გონიერი,

მედგარ შრომით მიზნისაკენ

მიდიოდი ქედუხრელი,

შრომის ნაყოფს მოესწარი,

გაზდი ქვეყნის საყვარელი.


ვაშა, ვაშა შენსა სახელს

და შენს მშობელს პატიოსანს!

ვაშა ერსაც, რომ იძლევა

ქვეყნისათვის შენებრ მგოსანს.

კორტონა


 ითა შუქურა წყვლიაღში,
 ობლობდი, მარტოხელობდი,
 დარაჯად უღექ ქვეყანას,
 მოვაჟაკობდი, ქველობდი ;
 დაკარგულ სატრფოს ძებნაში
 ავთანდილ-ტარიელობდი,
 ტკბილ-ქართველობდი თავითვე,
 მუსიკობ-რუსთაველობდი !...

ჩენის წარსულის მოწმობით
 აწმყო დარღს გაიქარებდი,
 მყობადს იწვევდი ოცნებით,
 მითივე გაიხარებდი ;
 მახვილი კალმის წვერითა
 ქვეყნის მტერს ასამარებდი,
 უზმობდი დედას ქართლისას,
 ანიებ-ათამარებდი !...

მშობელი ქვეყნის ვარამი
 უბით რომ გიტარებია,
 ვით წალკოტს ნერგი დაგირგავს,
 გიზრდია გიხარებია ;
 სამშობლო—ხატსა, ქვეყანა—
 სახატეს გიდარებია,
 თვით წმინდა სანთლად ნთებულხარ,
 გიციმციმ-გიდარებია !...

ნამაგარი ქვეყნისთვის
 იღუმალ განაზრახვეი,
 მესაიდუმლობ ერის გულს,

მისგანვე ნარწევ-ნარხევი!
 აჰა, იხილე ნაყოფი,
 შენგანვე ნამუშაკევი:
 შობილმა მშობელს მიუძღვენ
 გრძნობა-ფიქრთ ნაკარნახევი!...

—
 აგყვავებია იმედი,
 „გმირებს უყივის ნალარა!..“
 არა თუ შენი, მოხუცო,—
 მტრის გული იჭემა დალარა!...
 მეც, შენსა მორჩილს, მოწათეს,
 რომ გული დამწყდეს ალარა,
 ნება მომეცი დაედაფნო
 ეგ შენი წმინდა ჭალარა!..

დ. თომაშვილი



აკაკი, გიხაროდენ!



მ უკანასკნელ წლებში ყველა „ერთობას“ გაიძახიდა სიტყვით, და საქმით კი, როგორც წინათ, ეხლაც ჩვენი საზოგადოება ისევე დაქსაქსულია, დაქუცმაცებულია. დასებათ და ჯგუფებათ დაყოფილი და ერთი მეორესაგან განცალკევებული, როგორც წარსულში, და ეს იყო ყოველთვის ჩვენი ისტორიული ქირი და ვარაზი. თემათ და თემათ დაყოფილი საქართველოს ხალხი ერთმანეთს ებრძოდა, ამას აღეგდა თავის ძალ-ღონეს და ამითი თავის თავს ჰღებავდა, უმეტეს გარეშე მტრებისა...

აკაკიმ თავის ნაწერებში „ერთობის“ იდეალი განახორციელა და სული ჩაუდგა: იმისთვის არ იყო არც იმერეთი, არც კახეთი, არც სამცხე, არც რაჭა და სხვანი,—იყო მხოლოდ **ერთი საქართველო**, და მგოსანი ნახევარი საუკუნე ამას თავს ევლებოდა და დასტილებდა, როგორც არწივი თავის წიწილებს, და თანაც მოსთქვამდა და ზედ დამღერდა მშვენიერი ლექსით ხან „გლოვის ზარის“ კილოზე და ხან „ძღვეისა“ გალობისა გალობით. „ერეკლე“, თუ „თორნიკე“, თუ „სოლომონ დიდი“, თუ „როსტომ, რაქის ერისთავი“ და სხვანი ამერ-იმერნი ყველანი იგივე ქარბლოსიანი იყვნენ, სულ ერთი ჯურის, მოდგმის და ტომის, ერთი ქართველი დედის ღვიძლი შვილნი იყვნენ იმის თვალში, სულში და გულში და სულ ერთ ქართველ ერს შეადგენდნენ.

ეხლაც, ნახევარი საუკუნის დღეობის გამო დღესასწაული აკაკის პატივსაცემად გამართული აღმოსავლეთის საქართველოს დედა ქალაქში, თბილისში, მოასწავებს იმავე „ერთობას“ ამერ-იმერისას. ღმერთმა ინებოს, რომ

დაუნის გვირგვინით შემკულის მკონის იდეალი „ერთობისა“ შეიქნას წინამორბედი ჩვენი ერის გაერთიანებისა, ძმობისა და სიყვარულისა, და მთელმა ერმაც განახორციელოს ეს ერთობა თავის ცხოვრებაში, სარწმუნოებაში და აზროვნებაში თავისი ენით, სწავლა განათლებით, ხელოვნებით, მოქალაქობით, ბრძნული განწყობილობით და თანხმობით ერთმანეთთან, რადგან უბედურებამ კაცს ქკუა უნდა ასწავლოს...

აღ. ცაგარელი




აკაკი და „სოფლიო გოდების“ პოეზია



აკაკის მარგალიტებით აწყობილს ქმნილებას ერთი ჰანგი უფრო გაბედულად და თითქმის განუწყვეტლივ დამღერის, უკეთ ვთქვათ დაჰკენესის. ამ ჰანგს პესსიმისტური ელფერი სდევს, იგია „სოფლიო გოდების“ მეთოდი, რომელიც გაისმის დასავლეთის და აღმოსავლეთის პოეტთა ნაწერებში. იმ პესსიმისტთა ჯგუფს, რომელსაც ეკუთვნიან მეფე სოლომონ-ებრაელი, ომარზაიამ სპარსელი, ბაირონ ინგლისელი, ლეოპარდი იტალიელი და სხვანი, უერთდება თანამედროვე ჩვენი პოეტი. ამ დიდებულს მგოსანს, უკმაყოფილო მწერალთა მსგავსად შესისხლხორცებული აქვს განსაკუთრებით სალირიკო პოეზია და თვით დრამა-ეპოსში იგი უცვლელად რჩება გრძნობის მოციქულად ღმკადაგებლად. თვით სალირიკო დარგშიც მისს ჩანვს აღღერებს ორგვარი სიუჟეტი: სატირა და ელეგია, კმუნვის და გაკილვრს სიმეზი, ანუ, როგორც თითონ გვამცნებს „ცრემლში ნალესი ნალველი და ნალვლიანი მწუხარება“. იგი ხშირად ემდურის თავისს ხვედრს, უზედო თავს, მოსთქვამს მწარედ გულის მოდუნებას და ოცნების გაქარწყლებას. გაუქრება რა ნაზმანები „საამური ჩვენება“, თვალწინ გადემლება „პიჩზავი სამშობლოს სურათი. აქ, ამ „სოფლად“ შეუწყნარებელი და შეურიგებელია: დაიარება მარტოკა — ობლად, დეენილი ყველასაგან საქმით და სიტყვით“. პოეტის გულში ჩასახული „იდელი ვერსად მოინახა“. წინააღმდეგ, მისმა „ეკლით ნაჩხლეტმა“ არსებამ განიცადა ბევრი ტანჯვა, ვაება: მეგობარმა

ულალატა, სატრფომ სხვაზე გასცვალა, ცხოვრებამ ტკბილი წყაროს მაგივრად მწარე სამსალა შეასვა და ასპარეზი იავარდის მაგივრად ჭინჭრით მოუფინა. მოწამებრივმა სვემ პოეტი სასოწარკვეთილებამდე მიიყვანა და გულ-ამოსკენილს ათქმევინა: წარსული აღარ მარგებს, მომავალი მენანებაო. ქვეყნიური ამაობის შეგნებამ გაუღვიძა სიკვდილისადმი მისწრაფება: „ღმერთსა ვვედრებ, რომ მგღირსოს საფლავში დაძინება, სჯობს სულ განქრეს კაცი, რადგან მტვერია“. ამაობათა ამაოება და ყოველივე ამაო, ამბობს მეფე სოლომონი. პესნიმისტი ლეოპარდი ამასვე განიჟეორებს და იტყვის: მე შევნატრა მიცვალეულთ და მხოლოდ მათთან მსურს ხვედრის გაცვლაო. ამათ ბანს აძლევს ჩვენი ხცოვანი პოეტი და დასკვნის გამოცდილი და დაკვირვებული გონების ძალით: „სიცოცხლე არის მონება და სიკვდილი განსვენებაო“. ამ გვარად, დიდებული ქართველთა მგოსანი წარმომადგენელია იმ სალიტერატურო მიმართულებისა, რომელსაც ეწოდება „მსოფლიო გოდების“ პოეზია.


ა. ხანანაშვილი



*
* *

ქ მთანი მყინვარ-იალბუჯისა
 ცამდე ასულნი, მიუწდომენნი,
 აქ ველნი რიონ-ალაზანისა,
 სულის და გულის დამატკობენნი;
 იქ ზღვა, მრისხანე, მღელვარ-მშფოთავი,
 და საშინელი მისი ღრიალი,
 აქ-კი ბულბული, ნაზად მსტეინავი,
 და ნაკადულის ტკბილი ჩხრიალი!
 აი ბუნება ჩვენის ქვეყნისა,
 როგორც სა?ოთხე, აყვავებული,
 და ჰანგიც შენის პოეზიისა,
 მისებრ, მშვენიერ და დიდებული!..

დუბუ მეგრელი.






* *
* *

შერ მომკვდარა, არც მოკვდება,
 ვინც შობს და ზრდის შენებრ შეილსა,
 მას ეძინა, დღეს იღვიძებს,
 ფხიზლდება და სტოვებს ძილსა !
 ყურში ჩასწვდა შენი სიტყვა,
 მისთვის იყო მეტათ მწარი,
 ნატრობდი და აგისრულდა :
 გაღვიძებას მოესწარი !
 მოგილოცავე, ამაგდარო !
 რომ მან იწყო აწ ადგომა ,
 უნაყოფო აღარ დარჩა
 შენი ღვაწლი, შენი შრომა !
 ემაგ შრომას შეალიე
 საუკუნე ნახევარი,
 და ბნელაში მოძმეთა გზას
 ანათებდი, ვით ლამპარი.
 შენ პირადი სარგებლობა
 იმ თავითვე უარყავი,
 სხვის საწამლოთ არა გშურდა
 არც შრომა და არც თვის თავის !
 გვერდში უდექ ჩაგრულ მოძმეთ,
 მათ ჭირს შენათ ისახავდი
 და შენს ფიცსა პატიოხანს,
 პატიოხნათ ინახავდი !
 სხვებს რომ თვალზედ ცრემლს აშრობდი,
 მისთვის ბევრი შესვი მწარე,
 მაგრამ შენს გზას არ უმტყუნე

და გვერდი არ აუარე!..
 ვერ დავლალა მუდამ ბრძოლამ,
 კვლავ მხნე ხარ და კვლად შრომობ
 და მსცოვანი, სპეტაკ წვერა
 ყმაწვილებთან ერთად ომობ!..
 დღეს შენთან ვართ ჩვენ სულყველა,
 შენგან ამაგდადებული
 და შენდამი სიყვარულით
 ტკბილად გვიძგერს ყველას გული!
 ყოველ მზრიდგან მოგიგზავნიო
 სიყვარულით სავსე სალამს
 და თაყვანს ესცემთ მოწიწებით
 შენს ქნარსა და შენს მკვეთრ კალამს!
 ყველას გვინდა აგიყვანოთ
 და გატაროთ ხელით ნაზათ,
 გადგიშალოთ წმინდა ფეხთ ქვეშ
 ჩვენი გული ფიანდაზათ.
 შენზედ ფიქრობს დღეს ყოველგან
 შენი მოძმე, შენი ერი
 და ცდილობს, რომ პატივი გცეს
 შენი ღვაწლის შესაფერი!..

გრ. ცენტერაძე






* *
* *

თა შეთოვლილა, ბარს ნისლი აწევს,
ქარი სისინებს, ქარი ღრიალებს,
ყორანთა გუნდი ტრიალ მინდორში
სამშობლოს გმირებს თავს დასტრიალებს!
მტლათ დადებულან... სპეტაკი თოვლი
იმათ მკერდიდამ სისხლს შეიღებავს,
ცეცხლს გადაუწვამს დაბა, სოფელი,
ნაონარ კერას ძალლი უყეფავს!
აქ მიჩხარუნებს რკინის ბორკილი,
იქ შავი კუბო მიაქვ სიმშვილსა,
და ერის ცრემლზე მტერი ვერავი
გამარჯვებული უკრავს საყვირსა,

—
მაგრამ ჩუ! მღერის ჩანგი მგოსნისა,
გულში იმედი შემოაპარა,
შავ ზღვამ კასპიის ზღვას ჩაახლართა
აღქაფებული ტალღათ კამარა!
თრთიან სიმები, კავკასიის მთაც
ღვართქაფს მოისერის, ბობოქრობს, გმინავს,
კვლავ ბრძოლის ველზე ხელში უჭირავს
თავისუფლების დროშა ამირანს!
აი, მგოსანო, ორმოცდა ათ წელს
სამშობლოსათვის შენი ამაგი
გვწამს: ერის გულზე, თავისუფალზე
აღიმართება ეგ შენი ჩანგი!

ი. ევლოშვილი



აკაკი წერეთელი შოთასა თხოვს:



ასწავლე საიდუმლო ჟღერისა, რათა „მგოსანი ვიქნე ერისაო“ მართლაღ, აკაკიმ ზედ-მიწევნით შეასრულა ეს წადილი: იგი მისწვდა ჟღერის საიდუმლოებას და მით შეიქმნა მგოსანი ერისა. აკაკის ლექსი ყველასათვის, ვინც უნდა იყოს იგი განათლებული, გინდ სრულიად უბრალოც - ადვილი გასაგებია, იგი ყველას სულში ჩასაწდომი და ამძაგერებელია. აკაკი დიადი და შეუღარებელი ხელოვანია ლექსთა მარგალიტის მძივებით ჩამოსხმაში. მისი ლექსი სუბუქი და ნარნარია, ადვილ-გასაგები და მკვირცხლი. ამ ხელოვნებით აკაკიმ ქართული ენა გააფაქიზა, ნარნარ ჰყო სასმენათ და გაამდიდრა, გაამრავალ-ფეროვანა ნამდვილ ქართულ სიტყვათა აგებულებით, მოკაზმულობით. ამ თვისებისა გამო კი ქართული ენა მისაწდომი და გასაგები შეიქნა მთელ ხალხისათვის: ეს ენა გაეროვნდა, ე. ი. ქართველ ხალხის ყველა წრისა და მდგომარეობის კაცისათვის ადვილათ გასაგები და სასიამოვნოთ სასმენი შეიქნა. ამ მხრით აკაკიმ უკვე მთელი სკოლა შექმნა და სამუდამოთ განდევნა მძიმე და უშნოთ აწყობილ ლექსთა თხზვა. დღეს მგოსნობას ვეღარავინ დაიჩემებს ისე, თუ რომ მისი ლექსი გარეგანი ფორმით აკაკისებურათ არ არის აწყობილი.

ასე ხელოვნურათ აწყობილ ლექსს აკაკიმ შინაარსი საეროვნო მისცა. აკაკის ლირიკა თავიდან ბოლომდე ერთი გაუთავებელი მოთქმავა, „საერო კვნესით“ ავსილი. აკაკის ჩონგური მუდამ საერო კვნესით ჟღერს და ეს საერო კვნესა კი სრულებით ადვილათ, ძალ-დაუტანებლათ ვრცელდება ხალხში ამ ენის წყალობით. საერო მისწრაფებათ ასე ვერ გაავრცელდება ხალხში რამდენიმე ასი პროპაგანდისტიკ კი, რადგან აკაკის ჩონგურის „კლინ-მანჭი ხმა-ტკბილის“ სმენა ხალხს განუწყვეტლივ ენატრება და ამ ენას იგი ეტანება; ამ ჩონგურის „სიმი ბულბულის ენაა“. ფრთები კი „არწივის ასხია“

და ამიტომ დილაღე შეშვენის აღმაფრენა. ეს აღმაფრენა კი არის დიადი „საერო კენესა,“ რომლით მგოსანი მარად-გულ-მოკლულია. რა-ღა გასაკვირ-ველია, რომ ამ სიმაღლემდე ასული აკაკის ჩონგური პირდაპირია და მართ-ლის მქადაგებელი, ეს ჩონგური სიმრუდით სიმთ არ აქლერებს და არც ვისმე მიეფერება, რადგან ეს ჩონგური სრულ პასუხის მგებლობას იღებს მთელი ხალხის, მთელი ერის წინაშე. ამიტომ ეს ჩონგური სრულ უშიშ-რობით და მიუფერებლობით აშკარათ იტყვის, „ალარ ვნატრობ აღარასა, რომ სამშობლოს მტრის სისხლითა ვიღებავდე ქალარასაო“. ეს პირდაპირობა და მიუფერებლობა, ეს სიმართლის გულ-ახდილათ თქმა კი ხომ ყოველ დიდ-ბუნებოვანი ადამიანისა და დიადი მგოსნის ნიშნობაჩივი თვისებაა. აკა-კიც სწორეთ ასეთია.

ი. ფანცხავა





ეთრი სუმბული, ნორჩად აღზრდილი,
წყალში აჩრდილსა ეალერსება ;
ნელი ნიაეი მას ოდნავ არხეეს,
სურნელი უხვად ველს ეფინება !

შენც სუმბული ხარ, დიდო მგოსანო,
ერის გულს ეტრფი, ულეიძებ ფიქრებს ;
ციური ხმებით უტკობ სმენასა,
როს თრთოლვით აქდერ ჩანგის ნაზ სიმებს !..

ხან კი ტალდა ხარ ნელად მქუხარე...
ჰშფოთავს და ჰღლეავს ამაყი სული ;
გმირებს უყივის, „სკიეთს“ არ უღრკება,
სულ წინ მიჰფრინავს გამალებული !..

ხან აჩრდილი ხარ ივერიისა,
მუდამ თანა სდევ, არა ჰშორდები ;
სიამაყითა მოიგონებენ
შენს დიდსა სახელს შვილიშვილები !..

ბ. შანშიაშვილი

მყინვარი

ქავკასიის მაღალ მთებსა და თოვლ-ყინულიან მწვერვალთა შორის მედიდურად ამართულა მძლავრი მყინვარი.

ბუმბერაზი ბუმბერაზთ შორის, თმა-თეთრი — მწვანე თმიანთა, ქუდიანთა, უქულოთ შორის, იგი ამაყი, მიუვალი და ძალოვანი, ვით დიდებული მამა დიდებული ოჯახისა, მკაცრის თვალით გასცქერის თვის ძმებს, შვილებს, შვილის-შვილებს და წარბ-შეკრული ეუბნება მათ: — იყავით დიდებულნი, იარსებეთ, არ მოისპოთ და არ გაჰქრეთ დედა-მიწაზე!

და ღირსეული ოჯახის წევრნიც, მისი დიდებით განდიდებულნი, ამაყად დასცქერიან ზეცის სივრციდან ადამიანის, ცხოველისა და მწირის მიერ გადაქელილსა და გადალახულ ქალებსა და ველებს, — არ გავქრებით, ვიარსებებთ; წვიმა და მზის ვერას დაგვაკლებს, ვერარას გვიზავს ადამიანიც: ვერც წაგვიღებს, ვერც გადაგვკლავს! — უპასუხებენ შვილნი მშობელსა და შესცქერიან ოჯახის ბურჯს კრძაღვით, რიღითა, სიამაყითა.

და სდგანან მაგრად გოლიათები, ხოლო მათ შორის მათი მეფე მძლავრი მყინვარი.

სდგანან და მაგრად უკიდიათ ფეხი მიწაზე, ხოლო თავები მიუბჯენიათ ცის კიდურისთვის და აქაც და იქაც ღმერთნი არიან — თვით მყრობელნი, ხელ-შეუხებელნი, კანონ-გარეშე —.

რა არის მათთვის „ბუნების მეფე“ — ადამიანი !?!

მყრალი მკბენარი სპილოს სხეულზე!

რას დააკლებს მათ ცხოველი, მწირი ?!

რას დააკლებს შვილი დედას ძუძუს მოწოვით?

რას მოუტანს მათ წვიმა, ქარი, ქექა-ქუხილი?!

მხოლოდ წუთიერ უსიამოვნობას, წუთის შემდეგ კი სიამოვნებას და სიტკობებს!

აგერ! შეხედეთ! მთის ფერდობებზე ხან მიცოცავს და ხან მიბობლავს საცოდავად ადამიანი, ოფლი ასკდება, მუხლოთ ეკეცება, ხენწის და კენწის, საქმეს კი მაინც არ ეშვება: უნდა მეფობა, უნდა დაპყრობა, როგორც დაიპყრო და დაიმონავა მთელი ბუნება. სად? სად მიხვალ, ქვეყნის მქაშელო? აგერ! შეჩერდა, სული მოითქვა, მთის მწვერვალებს თვალი მოავლო და... ოჰ, განგება! „ბუნების მეფე“ ნამდვილ მეფესთან მონად იქცა, მთლად მოიკუნტა და შერცხენილი, შეშინებული საცოდავად უკან გაიქცევა....

— შორს ჩვენგან, შორს! — მისძახიან მას მწვერვალები — და შორს წაიღე წყეული შენი ბარი და ცული!

მაგრამ ეს რაა? ცა მოიღუშა, ცა მოიღრუბლა, კილით კიდემდე შეკრთა, შეირყა, შავი ღრუბელი შეკრბა, შესქელდა, ძირს ჩამოწვა და არე-მარე ჩამოაბნელა. ქექა-ქუხილი ორად ისმის, ზეცასა და ძირს, ნაკლები ხმითა, მაგრამ პრისხანედ ბანს აძლევენ მთის ხეობანი, წვიმა და ქარი დანავარდობენ ტყეს და ველში, ელვა სჭრის ღრუბლებს და იკლავება მაცდურ გველივით.

ჯოჯოხეთია! რომელი რომელს სპობს, ვინ ვის ამარცხებს, ვინ სუსტია, ვინ ძალოვანი, ვინ გაიმარჯვებს არავინ იცის და... და რა მერე? გავიდა წუთი, ქარს ღოჯი მოსტყდა, წვიმა შეთხელდა, ელვა გაჰქრა, შავი ღრუბელი მიმოიფანტა და გზა დაუთმო მზეს მაცოცხლებელს, მზესა მხიარულს.

და მზის სხივებს ქვეშ უფრო ნათლად, მეტის დიდებით კვლავ აღიმართნენ კავკასის მთები, ხოლო მათ შორის კვლავ ძალოვანი კვლავ უკვდავობა მამა-მყინვარი.

— ვაშა, ჩვენს მამას! — მხიარულად სალამს აძლევენ მორჩილნი შვი-
ლნი. — ვაშა ჩვენს ძალას, ვაშა ოჯახსა!

მაგრამ მყინვარი, ღრმად მგრძნობიარე და ღრმად მოაზრე, მხიარულს
სალამს ყურს არ ათხოვებს და იმავ თვალთ, იმავე წარბით კვლავ ეუბნება
თვის შეილებს: — იყავით მარჯვეთ! ვერა მტერი ჩვენ ვერას დაგვაკლებს!

სვ. ყიფიანი





ამშობლოს მთელმა მიდამომ,
 მთა-გორამ, ბორცვმა ტყიანმა,
 ტურფა წალკოტში ნაზარდმა
 ზამბახმა, ვარდმა, იამა —

ლაქვარდ ციდანა ციმციმით
 ვარსკვლავმა, მზემ და მთვარემა,
 ძირს დედამიწამ, გარშემო
 ქალებმა, ხევ-მდინარემა —

მათ საამაყო ძვირფას შვილს
 თავ-დახრით გიძღვნა სალამი,
 ერთ-ნმათ აღიდეს ოთხ კუთხივ
 შენი უკვდავი კალამი.

ღარია



სინათლისაკენ

—:—



მერთო, რა საშინელებაა! განწირულებით შესძახა ახალგაზდა ქალმა და მიაშტერა თვალები იქით, საიდგანაც მოსჩანდა ბნელში გახვეული სოფელი. სოფელის შესწიოდნენ წყვილადს, შერიგებოდნენ მის განმანადგურებელ ძალას, დამონებოდნენ. ქალს გული უკვნესოდა, უნდოდა გასცლოდა სიბნელეს, მაგრამ არ იცოდა საით წასულიყო.

— ვინ გამიყვანს ამ წყვილიდან? სად არის ხსნა? საით წავიდე? შესძახა კვლავ ქალმა.

— იქით, იქით! ჩასძახა ამ დროს ყურში რაღაც იღუმალმა ხმამ. ქალი დაემორჩილა უხილავ ძალას და აჩქარებით გასწია დრო. და დრო შედგებოდა, შეშინებული იხედებოდა სოფლისკენ, საიდანაც მოისმოდა ყვირილ-კიჟინი მოქეფეთა, შშიერთა წყევა-კრულვა, კვნესა-ტირილი. ძალით სიცოცხლეს გამოსალმებულთა სისხლის წვეთები წითელ ზოლებათ ციალებდნენ სიბნელეში.

— საშინელებაა!.. კვნესოდა ქალი, სახეზე ხელები მიეფარებინა და მირბოდა.

ამ დროს მოისმა საამო ეღერა. ქალი შეჩერდა, ხელები ძირს დაუშვა; სმენამ არ უღალატა; თვალს უჩვეულო საგანი წარმოუდგა: ცას ზინდი გადაჰყროდა, ლურჯათ კაშკაშებდა; მალლიდგან ძირს სვეტად ეშვებოდა თვალის წარბათა უუქი და შარავანდელათ თავს ადგებოდა დინჯათ მომავალ ღვთიურის სახის მოხუცს, რომელსაც ხელში ჩანგი ეჭირა. მოხუცის ცეცხლის მფრქვევი თვალები პირდაპირ იყურებოდნენ, ხელის თითები არ შორდებოდნენ სიმებს, რომელნიც სტიროდნენ, კვნესოდნენ,.. მოხუცს თვა-

ლებში ცრემლი უბრწყინავდა, ტუჩებზე ნაღვლიანი ღიმილი უკრთოდა, ციურ-რი შუქი თანასდევდა, ფეხქვეშ ეფინებოდა, გზას უნათებდა.

— აი, რას ვეძებდი!.. შესძახა ქალმა და ორივე ხელები გააწვდინა სინათლისაკენ.

მოხუცს შეესმა ქალის ხმა და ღიმილით მოქედა. ქალის სახეზე ამოიკითხა ვედრება... აქლერდა ჩანგი... ქალის გონება წუთს მოშორდა დედამიწას და ცის სივრცეში იწყო ფრენა.

— რა კარგია!.. რა ბედნიერებაა!.. ალტაცებით ჩურჩულებდა ქალი... მოხუცმა წასვლა დააპირა ..

— ღვთის გულისთვის ნუ დამტოვებ აქ! მეც თან წამიყვანე!.. შეევედრა ქალი. მოხუცმა თანაგრძნობით გაუღიმა.

— დიდი ხანია ვეძებ სინათლეს, მაგრამ ჩემ თვალებს არ ღირსებია მისი ხილვა, ეხლა კი ვნახე და, სანამ ცოცხალი ვარ, ვერ მოვშორდები! ამბობდა ქალი.

— მოჰყე მას! უთხრა მოხუცმა.

— გზას რომ ავცდე?

— უსმინე ამ ჩანგის სიმებს და არ ასცდები! სთქვა მოხუცმა და წავიდა კვალად, აქლერდა ჩანგი და თან გაიყოლა ქალიც ..

ანასტასია ერისთავ-ხოშტარია





ღელღოს სიმწვანე მოვპარე,
 სინაზე—ტურფა იასა,
 სურნელოვნება, ელფერი —
 კოკობ ვარდს, გულ-მკერდ ღიასა;

ციმციმი — მალხაზ ღილის ცვარს,
 სიმშვენიერე — გაზაფხულს,
 და ბრწყინვალეობა — სხივ მფენ მზეს,
 ლაქვარდ სივრცეში გაბადრულს;

კაშკაში — ცისკარ-განთიადს,
 ფერ-მკრთალი შუქი — მთვარესა,
 და სილამაზე — ათასფრათ
 მოქარგულ არე-მარესა!

მიზიდველობა — ანდამატს,
 ტკბილი ხმა, — ლამაზ ბულბულსა,
 და სიხალისე — ნაკადულს,
 კიდევ-ნაპირებ შემკულსა...

მთელი სიტურფე ბუნების
 შეეკარი თაიგულათა
 და შენ მოგიძღვენ, მგოსანო,
 ეს შენ გეკუთვნის სრულათა!

ვ. რუხაძე



ღეს დღეობა აქვსთ ქართველებს,
 ფეხზე დგას მთელი ერია,
 გარს გახვევიან შვილები—
 შუაში სდგევხარ ბერია!

პატრისა გცემენ დიდ მგოსანს
 რითაც უწევდებათ ხელია,
 ნადეაწი დაგფასებია,
 მითი ხარ ბედნიერია!

შ. ნავთლულელი



ქართულ პოეზიის იალბუჯი



არმოიდგინე, მკითხველო, მაღალის მთის წიაღიდან გამოვარდნილი
 ანკარა წყარო, რომელიც მუზიკალური შუღლით ძირს ჩადის
 და აჩენს ვეებერთელა მორევს უწმინდესის წყლისას, ეს ბროლისებური მორვეი
 შეუდარებელი სარკეა ბუნებისა. მასში მშვენივრად იხატება მისი ნაპირების
 მცენარეულობა, მასში კამკამებს ცა, მზე, მთვარე, ვარსკვლავები, მასვე თავის
 სარკედ ხმარობენ ღრუბელნი ცისანი. ამავე ღროს ამ კამკამა მორვეის ძირში
 ისე ცხადად სჩანს ყველაფერი, რომ თვითეულს კენქს ადვილად დასთვლი.
 სწორედ ამას, ამ საარაკო სიწმინდეს და სიცხადეს, მოტყუებაში შეჭყევეზარ :
 შენ ეს მორვეი თხელი გგონია. მაგრამ აი ჩაუშვი შიგ ვეებერთელა ქოლო-
 კი, და მან ძირის ნახევრამდინაც ვერ უწია. მორვეი მეტად ღრმა აღ-
 მოჩნდა.

სწორედ ამისთანა თვისებისაა ის პოეტური და ლიტერატურული ზღვა,
 რომელიც შექმნა აკაკის მაღალმა ნიქმა. ეს ზღვა თხელი გეჩვენება, რად ?
 იმიტომ, რომ საარაკო კაშკაში გააქვს და შიგ ყველაფერს მეტად ადვილად
 და ცხადად ჰხედავ. ჰხედავ არა მარტო შენ, დიდი, არამედ რვა-ცხრა წლის
 შეგნებული ბავშვიც, და ეს უფრო ატყუებს. მაგრამ აი მოიკრიბე გონე-
 ბა, ღრმად ჩააკვირდი აკაკის თქმულებათა შინაარსს, შეგუდარებელს ფორმას,
 და აღტაცებაში მოგიყვანა მისმა საოცარმა კაზმულობამ, მისთა აზრთა და
 გრძნობათა სიღრმემ, მისმა მისწრაფებათა სიმაღლემ. განსვენებულმა დავით
 ერისთავმა, „სამშობლოს ავტორმა“ ერთხელ მითხრა : „პეტერბურგში ყო-
 ფნის ღროს Вѣстникъ Европы-ს რედაქციაში წავიკითხე რუსული თარგ-
 მანი თორნიკე ერისთავისა და ყველა მსმენელი გააოცა მთელის პოემის
 მაღალ-კაზმულობამაო... როცა გაზეთს „კავკაზში“ დაიბეჭდა ფელეტონად
 თარგმანი პატარა ქმნილებისა : გვირგვინი დავით მეფისა (Входъ царя Да-

вида), საუკეთესო რუსი ინტელიგენტები აღტაცებაში იყვნენ და ამბობდნენ: *Какая редкая художественность, какая высота мыслей, какая глубина тонких чувств* (რა იშვიათი კაზმულობაა, რამ სიმაღლე აზრებია, რა ღრმა და წმინდა გრძობებია) ამ სამი იშვიათის ღირსების ბეჭედი აზის აკაკის ყველა ქმნილებასა. ხოლო ამ სამს ღირსებას, ერთად შეზავებულს და ერთს ღონეზე დაყენებულს, ვპოვებთ მხოლოდ დიდს (ტალანტებებში), მსოფლიო გენიოსებში. მაშასადამე...

თავის საუკეთესო გმირს მეფე ერეკლეს კახელებმა დაარქვეს მეტ სახელად: პატარა კახი. რად? იმიტომ, რომ მისს მალაღს ფსიხიკასა და ფიზიკაში, როგორც ფოკუსში, განხორციელებული იყო ყოველი ღირსება და თვისება კახელებისა. აკაკის მალაღი ბუნება იტევს თავისს წიაღში არა ერთს კუთხეს ჩვენის სამშობლოსას, არამედ მთელს საქართველოს, აკაკი პატარა საქართველოა. მაგრამ ამ დიდებულს სახელს მარტო მას ვერ დაუსაკუთრებთ, რადგანაც, თვით აკაკის სასიხარულოდ და ჩვენდა სანუგეშოდ, პატარა საქართველონი, სხვანიც გვყავს: რუსთაველი, ილია, ნ. ბარათაშვილი, გრიგოლ ორბელიანი, ვაჟა-ფშაველა, მსოფლის ტალანტები, გენიოსები ასეთს ძლიერს და ღრმა შთაბეჭდილებას ახდენდნენ მკითხველებზე, ისე ხიბლამდნენ მათ, რომ ბევრი ხდებოდა მათი მიმბაძველი, მათი მიმდევარი. აკაკიმ შექმნა თავისი საოცარი გავლენით მთელი სკოლა პოეტებისა. თითქოს ყველა ჩვენებურს მეორე ხარისხის პოეტს აზის ბეჭედი აკაკისა, ესენი ყველანი პატარა აკაკები არიან. ასეთი მოხიბლა შეუძლიან მხოლოდ გენიალურს პოეტურს ნიქსა, რომელსაც არ ემორჩილებიან მხოლოდ იმისთანა უთავისებურესი მგონებები, როგორც ვაჟა-ფშაველა.

ყველა მსოფლიო გენიოსები უმხურვალესი მამული-შვილები იყვნენ. მათ სხვებზე მეტად, ძლიერად უყვარდათ სამშობლო, როგორც საუკეთესო შვილს მეტობით უყვარს თავისი ღირსეული დედ-მამა. აკაკი განხორციელებული მამულიშვილობაა. მას საქართველო ისეთივე გავიწყებით უყვარს,

როგორც ტარიელს უყვარდა ნესტანდარეჯანი. რასაც უნდა სწერდეს აკაკი, ლექსით თუ პროზით, ყველაში გამოსჭვივის აპრიალეზული სიყვარული სატრფო სამშობლოსი. ამ მხრივ აკაკიზე ზედ გამოჭრილია გ. ორბელიანის ლექსი: „მისი ფიქრი, მისი სიტყვა თუ არ შენდა არსად იყოს, შენთან მისი დღე ბრწყინვალედეს, უშენოდ კი დაებნელოს“

ძლიერი სიყვარული სამშობლოსი ჰბადავს ძლიერს სიყვარულს კაცობრიობისას. მსოფლიო ტალანტები, გენიოსები, დიდი პატრიოტები, იმავე დროს დიდი მოყვარენიც იყვნენ კაცობრიობისა, ასეთია აკაკიც. ამ ფართო კაცთ მოყვარეობით აიხსნება ის ფაქტი, რომ აკაკის დიდი სახელი აქვს არა მარტო ქართველებში, არამედ სხვა ხალხებშიაც... ნელ-თბილი კოსმოპოლიტობა ჰბადავს ნელ-თბილს მამულისწვილობასა, და ეს ნელ-თბილობა, როგორც მკითხველს კარგად მოეხსენება, სრულიად უნაყოფოა, როგორც სამშობლოსთვის, ისე კაცობრიობისათვის, აი რისათვის აკაკი მტერია ამ ნელ-თბილობისა და ისე აფასებს და მალა აყენებს გულწრფელს და მხურვალე მამული-წვილობას ყველა მოღვაწეში. როგორც დიდს გულს მხოლოდ დიდვე გული იცნობს საცხებით და ყველაზე მეტად თანაუგრძნობს და უყვარს, ისე დიდის ნიჭის ღირსება სრულიად ესმის მარტო დიდს ნიჭსა, მარტო ის გრძნობს განსაკუთრებულს პატიოსნებას, მარტო იგი აფასებს ღირსეულად. ასეთს იდეურის ურთიერთობის მაგალითს ვპოვებთ, მაგალითად, გიოტესა და შილლერის შორის. მაშინ როდესაც ბევრნი შილლერს მალა აყენებდნენ გიოტეზე თვითონ შილლერი სრული გულწრფელობით უპირატესობას აძლევდა თავისს მეგობარსა. აკაკის და ილიას შორის პირადს მეგობრობას ადგილი არა ჰქონია; მაგრამ იდეური ურთიერთობა და პატივისცემა კი დიდი იყო. ამ მხრივ აკაკი შილლერს მოგავიწყებთ. წაიკითხეთ თელავში ნათქვამი სიტყვა აკაკისა, კამათი მისი ილიასთან ვეფხვის ტყაონის შესახებ, ბოლოს მისი სიტყვა ილიას დაკრძალვის დროსა და თქვენ დიდს სიამოვნებას იგრძნობთ, როდესაც დარწმუნდებით, რომ აკაკი უპირატესობას აძლევს

ილიასა. და ეს მომხიბლავს შთაბეჭდილებას მოახდენს ჩვენს ჩამომავლობაზე. როდესაც გაქრება ქორები აკაკის კერძოდ ნათქვამის შესახებ ილიაზე... სწორედ ამის გამო უნდა სწყენოდა აკაკის ფრაზა ბ-ნი ვ. წერეთლისა: „აკაკი რომ არ ყოფილიყო, ჩვენი ლიტერატურაც არ იქმნებოდა“. რითაც მიწასთან ასწორებდა ყველა სხვა მგონსებს რუსთაველიდან დაწყებული ილიამდე.

მაღალ-ნიჭიერნი გვამნი ნამდვილი დემოკრატები იყვნენ და არიან. როგორც მაღალი პსიხიურის აგებულობის პატრონნი, ივინი სხვებზე მეტად გრძნობდნენ იმ სოციალურს უსამართლობას და უთანასწორობას, რომლის წყალობით, ზემო კლასები ყარან სიმდიდრისაგან, მშრომელი ხალხი კი ყარს სიღატაკისაგან. გრძნობდნენ და მედგრად ქადაგობდნენ ამ უსამართლობის მოსპობას, გათანასწორებას, ძმობას, ერთობას. ასეთივე ქადაგება ძლიერად გაისმის აკაკის ლექსებში და პროზაში. მხოლოდ იგი კლასთა ბრძოლას თავისს სამშობლოში არ ამწვავებს, რადგანაც კარგად ჰხედავს, რომ ჩვენში სიმდიდრისაგან ახლა აღარავინა ჰყარს და ჩვენებურს კლასს სიღარიბის ნატი-სუსალი ძსდის ყოვლად უკუღმართ გარემოებათა მეოხებით. აკაკის იდეალია: აღორძინება მთელის ჩვენის ხალხისა მისი ქართველური თავისებურებითურთ. კუქ - მაძლარი ერთფეროვანი ნახირის შექმნა კი ეწინააღმდეგება მთელს მის ბუნებასა. ხალხი აკაკის გულ-წრფელს დემოკრატობას კარგად გრძნობს და ამიტომ უფრო მხურვალედ უყვარს იგი, ვიდრე არისტოკრატისს, თუმცა აკაკი ჩამომავლობით არისტოკრატია.

ზოგს მსოფლიო პოეტს აღმოჩენა მოუხდენია იმისთანა სფერაში, რომელსაც არავითარი კავშირი არა აქვს პოეზიასთან. გიოტემ, მაგალითად, ბოტანიკა გაამდიდრა იმისთანა აღმოჩენით, რომელიც გენიალურს ბოტანიკოსებსაც კი აზრად არ მოსვლიათ. ჩვენი აკაკის ნამოქმედარშიაც მოიპოვება მსგავსი პოეტი. ქიათურის შავს ქვას არაფრად აგდებდნენ არც ჩვენებურები და არც უცხოელნი, თვით სპეციალისტებს გეოლოგებს იგი მიაჩნდათ უბრალო

და უსარგებლო ქვად. მაგრამ ჩვენმა სახელოვანმა მგოსანმა სხვა თვლით შეხედა, ლითონად დასახა ეს ქვა და ამცნო ქვეყანასა, და ეს აღმოჩენა გახდა წყაროდ ხალხის გამდიდრებისა.

თვით ნაკლულევანებითაც აკაკი მსოფლიო ტალანტებს გავს. ზოგნი მათგანნი მოგაგონებდნენ სახარების ჩიტებს, რომელნიც ხვალინდელს დღეზე სრულიადაც არ ზრუნავდნენ: ფული მათ ხელში არ მიეცემოდათ, რადგანაც ბზესავით აბნეოდნენ, და დღეს ფულიანნი, ხვალ უკაპეიკოდ და უსახსროდ რჩებოდნენ. ასეთია აკაკიც გატაცებული მაღალი იდეებით, იგი ყურადღებას სრულიად არ აქცევს ცოდვილის ცხოვრების პირობებსა და მუდამ გასაკირშია. სხვა ხალხის გენიოსებს—ეს ძვირად არ უჯდებოდათ, რადგანაც მათნი სამშობლონი შემძლებელნი ქვეყნები იყვნენ. საქართველო კი ამ ჟამად ვალტაყებულია, და ამის გამო სახარების ჩიტების მსგავსებას შეიძლება მეტად დიდი უბედურება მოჰყვეს. შეიძლება უდროვოდ დავკარგოთ ის, ვისიც მაღალი ნიჭი საარაკო დაუმკნარობას იჩენს, და ძალუძს გაამდიდროს ჩვენი ლიტერატურა მაღალ-ნიჭიერი ქმნილებებით თუნდა ას წლამდინ...

სამართალი და საზოგადო სიკეთე მოითხოვს ისიც ვთქვათ, რომ ზოგნი გენიოსები, უმაღლეს წერტილამდე ასულნი იდეათა სფერაში, ცხოვრებაშიც ნამდვილნი ბრძენნი იყვნენ და ყოვლად ღირსეული ღონისძიებით მეტ-ნაკლებობით უზრუნველად ჰყოფდნენ თავის სიბერესა და დამოუკიდებლობასა. ასეთი იყო, მაგალითად, სოფოკლი, პირველი პოეტი ძველის უნიჭიერების საბერძნეთისა, შექსპირი, დიდება და ამპარტავნება ინგლისისა, გიოტე, პირველი პოეტი გერმანიისა, და სხვანი. ჩვენში ამავე ტიპს ეკუთვნოდა ძველს საქართველოში რუსთაველი, ახალში—ილია, ერთიც და უკანასკნელიც. ზოგი მწერალი რუსებს დაბალ რასად სთვლის და დასამტკიცებლად მოჰყავს ის ფაქტი, რომ უნიჭიერების რუსების ძარღვებში უცხოელი სისხლი სდიოდაო და სდისო. პუშკინში და ჟუკოვსკიში სკარბობდა არაბული სისხლიო, ლერმონტოვისაში—ირლანდიურიო, ლევ ტოლსტოისაში — მონგოლურიო,

და სხვანი. აკაკის შესახებ ამას ვერაფერს იტყვის: იგი მამითაც და დედითაც ნამდვილი ქართველია, და თავისი გენიალური ნიჭით მჭერმეტყველურად მოწმობს ჩვენის ერის ნიჭიერებასა.

ვინც აკაკის ქმნილებებს დაახლოებით გაიცნობს, ვინც შეიგნებს სრულიად მისი მაღალი ნიჭის ღირსებას, დააკვირდება მისს საოცრად მაღალს და განიერს შუბლს, რომელიც უდრის შექსპირის და გიოტეს შუბლს, იგი უსათუოდ იტყვის: აკაკი რომ ნორმალურს პირობებში და ნორმალურს სკოლაში აღზრდილიყო, იგი მსოფლიო გენიოსების რიგში საპატიო ადგილს დაიკვირდაო, როგორც დაიჭირა პატარა, მაგრამ დამოუკიდებელის ნორვეგიის შვილმა, იბსენმაო. თვით ჩვენს ნიჭიერს ერს რომ ღირსებოდა ნორმალური პირობები, თუნდ ფილიანდიის ავტონომია, მისი მდგომარეობა ახლა სრულიად სხვა იქნებოდა და აკაკიც კიდევ უფრო დიდებული მგოსანი შეიქმნებოდა, მაგრამ, საუბედუროდ, ის, რაც ჩვენმა ერმა მეთვრამეტე საუკუნის დამლევს სასურველ ნაესადგურად მიიჩნია, დახაესებული ქაობი აღმოჩნდა, რომელშიაც ლამის ჩაიხჩოს. სწორედ ამ ქაობის ატმოსფერამ დაუშალა აკაკის და მის ტოლს ჩვენებურს მგოსნებს მსოფლიო გენიოსებად გამხდარიყვნენ... ჩვენ სრული იმედი გვაქს, რომ უსასიქადულესი მგოსნის ორმოც და ათის წლის იუბილეს მთელი ქართველობა შავი ზღვიდან მოკიდებული დაღესტნამდე აღტაცებით გადაიხდის, და ამ დღესასწაულში მხურვალე მონაწილეობას მიიღებენ არა მარტო დიდნი, არამედ ნორჩი ქართველებიც, რომელთათვის სასიქადულო იუბილარზე შექმნა ბევრად მეტი საუცხოო ლექსები და მოთხრობები, ვიდრე სხვა ჩვენებურმა მგოსნებმა...

აკობ გოგებაშვილი

მწარე მოგონება

—:—



ნემს გულში 26 წელიწადი ვინახავდი და არ გამიძახებია ის საზარელი ამბავი, რომლის მოწამეც მე თითონ ვიყავი და, რომლის მოგონებაც დღესაც ტანში ჟრუანტელსა მგვრის, მაგრამ ახლა კი, ამ დღესასწაულის დღეს, აღარ ძალმიძს ჩემი გულის ნადები მთელს ქართველ საზოგადოებას არ გაუზიარო.

1882 წ. 25 ენკენისთვის, დილის მატარებლით აკაკი იმერეთიდან ჩამოვიდა ტფილისს და ჩამოხდა სასტუმრო „ივერიაში“, რომელიც მაშინ ჰქონდათ ძმებს ლევანსა და დავით ორეხალაშვილებს—ელისაბედისა და რიყის ქუჩის კუთხეში. აკაკიმ დაიკავა მე-4 ნომერი; მეც იმ უამად იქვე მეხუთე ნომერში ვიდექი, ჩემს გვერდით იდგნენ ჩემი ნათესავები ბარნაბა ნემსაძე და ვიქტორ ლეჟავა.

იმ ღამეს 12 საათამდე ჩვენ ყველანი, ძმების ორახელიშვილებითურთ (ორიც სხვა იყო, რომელთა გვარიც აღარ მაგონდება) აკაკისთან ვიყავით და ესტკებოდით მისი მოსწრებულის მჭერმეტყველურის საუბრით; შემდეგ გამოვეთხოვეთ და ჩვენს ოთახებში წავედით მოსასვენებლად.

მე წამოვწეკ ახალუხის ამარა ჩემს ლოგინზე და განვაგრძე კითხვა ახლად მიღებულის—ხოზეს მარმოლის პოლიტიკურის რომანის კითხვა, რომელიც იბეჭდებოდა მაშინდელს ჟურნალ „ივერიაში“ ამ სათაურით: „სიხე შიგნიდან გატეხილი“ თარგ. ი. ბაქრაძისა.

ჩვენსავით დაჩაგრულ დამონებულ ერის თავ-გამოდებულმა და მედგარმა ბრძოლამ. საშობლოს განთავისუფლებისათვის, რომელიც ხელოვნურად არის აწერილი ამ რომანში, ისე გამიტაცა, რომ ძილი დამიფრთხო.

საათის სამი გახდა. ყველას ეძინა. იქაურობა სამარისებური სიჩუმით იყო მოკლული, მხოლოდ ორი ფარანი ოდნავ ანათებდა საერთო მოაჯირს.

უცებ რალაც ფაჩუნი შემომესმა. ავსწიე თავი, დავუგდე ყური, მაგრამ ისევ სიწყნარე იყო. ორი წამის შემდეგ კიდევ შემომესმა ფაჩუნი, თითქო ვილაცის ფეხის ხმა იყო; ვიფიქრე, ალბათ კატა თუ არის მეთქი, რადგანაც წინ კარი დაკეტილი იყო და მუდამ მეკარე იდგა, ეზოში კი არავითარ ადამიანს არ შეეძლო შემოსვლა, იმ რიგად იყო გარშემოკრული და ისევ მივდე თავი; მაგრამ მალე კვლავ შემომესმა ფეხის ხმა და შევდეგ კარის ქრიალიც, წამოვხტი ზეზე, გავვარდი მოაჯირზე და უცებ თვალი მოვკარ, რომ აკაკის ოთახში ვილაცა კაცი შეძვრა; ელვის სისწრაფით გავექანე და მეც აკაკის ოთახში შევევარდი.

ღია კარებში შემოქრილ სინათლის შუქზე დავინახე აკაკის საწოლთან ავაზაკის ხელში აღმართული გაპრიალებული ბებუთი...

ის იყო უნდა ჩაეკრა გულში მშვიდათ მძინარე პოეტისათვის, რომ მივევარდი ავაზაკს, მარცხენა ხელი ვსტაცე საყელოში და უკან გადმოზნე-ქილს ავაზაკს მარჯვენა მუშტი დავარტყი სახეში; უცებ ვსტაცე მარჯვენა მაჯაში და შევსძახე: „დააგდე ხანჯალი, თორემ გავათავებ მეთქი“. ავაზაკმა ხელი უშვა იარაღს და აკაკის ლოგინის წინ წკრიალი მოიღო ბებუთმა.

მგოსანი შეკრთა...

მე იმ წამსვე გამოვათრიე გარეთ ავაზაკი, ხმაურობაზედ გამოვარდნენ გარეთ ნემსაძე, ლეჩავა, ძმები ოარახელაშვილები და სხვებიც.

ჩვენს აღშფოთებას საზღვარი არა ჰქონდა... თავი ვეღარ შევიმაგრეთ, ვეცით ავაზაკს და კინაღამ დავაღჩეთ... იგი უცებ გავათრიეთ მოსამსახურეების განაპირა ოთახში.

ავაზაკი ტირილით გვევედრებოდა:

— „შემიბრალეთ, ნუ მომკლავთ... მე სიმათლეს გეტყვი... ან წაიღეთ ეს ხუთი ათ თუმნანი, რომელიც იმ კაცის მოსაკვლელად მომცეს... აი კიდევ ქამარი,—ყველაფერი წაიღეთ, მხოლოდ ნუ მომკლავთ... ნუ დამაღწობთ“...

— ხმა, კრინტი, შე წუბაკო! შენა გსურს შენებრ ჩვენც ფულით შეგვისყიდო? არა, მაგ ფულს საიქიოს გაგატანთ, სთქვი ჩქარა ვინ მოგგზავნა? ვინ მოგისყიდა? რათა? რისთვის?!

— რას სჩადიხართ, მართლა არ მოკლათ ეგ კაცი!— შემოგვძახა კარებიდან მწუხარე, აკანკალებულის ხმით.

ეს იყო აკაკი, რომელსაც ტანისამოსი გადაეცვა და შემოვიდა ჩვენთან. აკაკი მთელი რიგი ახალგაზდათა თაობის აღმზრდელი იყო და მათ შორის ჩემიც, მთელი საქართველოს დაბალი ხალხის უსაყვარლესი და უძვირფასესი მგოსანი, მას შეეხაროდით ყოველგან და ყოველთვის, ის ჩვენთვის ღმერთი იყო...

აკაკის დანახვაზე ჩვენ შეეკრთით, სახტად დავრჩით, მისმა ფერ-შემკრთალმა სახემ ჩვენ ყველანი ჩაგვაფიქრა.

— თქვენ მიბრძანდით, ბატონო, თქვენს ოთახში, დამშვიდდით, მოისვენეთ, ამაზე ნუ სწუხართ, ამას ჩვენ მოუვლით!— ვუპასუხეთ ჩვენ.

— როგორ დავმშვიდდე ამისთანა მდგომარეობაში? გაანთავისუფლეთ თუ გიყვარდე?!

— როგორ ბატონო! თქვენი მკვლელი, ავაზაკი გაუნთავისუფლოთ?— მაშინ ჩვენ თავი ცოცხალი რაღათ გვინდა?!

— გეუბნებით არ შეიძლება კაცის ცემა, კაცის წვალება და სიკვდილი მეთქი!. გთხოვთ, ახლავე, ჩემის თვალის წინ გაანთავისუფლოთ ეგ შემძღარი დამიანი და გაუშვათ უვნებლათ.

— ბატონო! თქვენ უნდა მოეკალით ამ...

— დიახ! მე უნდა მოვეკალი, ხანჯალიც ჩემს საწოლთან გდია, მაგრამ მაინცა გთხოვთ უთუოდ გაანთავისუფლოთ და უვნებლად გაუშვათ; გთხოვთ ნულარცა სცემთ და ნურც პოლიციას გადასცემთ. — გვითხრა აკაკიმ.

ავაზაკმა დაიჩოქა აკაკის წინ და ტირილით უთხრა:

— ბატონო! მე ხომ თქვენ არ გიცნობდით, თქვენი თავი მხოლოდ ვაგზალში მაჩვენეს, თქვენთან ხომ თავის დღეში არავითარი საქმე არა მქონია, ღმერთმა ჰკითხოს იმათ, რომელთაც შემაცდინეს და აი ამ ხუთი ათ თუმანიანთ კუკუა და ნაშუსი დამაქარგვინეს!.. გთხოვთ, გვედრებთ...

— ჩაიღე ეგ ფული და წადი შენთვის, ღმერთმა მშვიდობა მოგცეს.— უთხრა წყნარად მგოსანმა.

ავაზაკი ამ სიტყვების შემდეგ მთლად დაიბნა: მოეხვია მუხლზედ აკაკის და ქვიფინი მორთო.

— ნუ სტირი, ადექი, წადი მშვიდობით!— უთხრა ღმობიერათ მგოსანმა.

ავაზაკი განაგრძობდა ტირილს და ზღუქუნით ამბობდა:

— ვაჰ, მე ამისთანა კაცისთვის უნდა ხელი შემეხეო .. ეს უნდა მომეკლა... მე სწორეთ შეშლილი, გაგიყვებული ვიყავი... მე ახლა კი მართლა სიკვდილის ღირსი ვარ! მომკალით ბარემ, უნამუსო ცხოვრებას სიკვდილი მიჩვენიაო,-- მოსთქვამდა ახლა ავაზაკი.

აბა ჩვენ აკაკის თხოვნასა და სურვილს როგორ გადაუდგებოდით!

ავაზაკს ხელი შეუშვეთ, მაგრამ მტკიცედ მოვსთხოვეთ სრული სიმართლე აღეარებინა ჩვენს წინაშე.

— მე ს... ვ— ი ვარ, ვინც მე, აი იმ ბატონის მოსაკლავად გამომგზავნეს, იმათგანს არცერთს არ ვიცნობ, არც მათი ბინადრობა ვიცი და არც მათი სახელი და გვარი; მე აქ დღისით მოვედი, წინაკარიდგან შემოვედი ჩუმად და ჩავიბარე ეზოში; იქ დახურულ დილიქანში ჩავწექი და იქიდან უთვალთვალეზადი, რომელ ოთახში იქნებოდა ის ბატონიო.

ავაზაკი შუა ტანისაზე ცოტა მაღალი იყო, ჩასხმული მხარ-ბეჭიანი, წაბლის ფერ წვერ-ულვაშიანი, ხნოვანობით ოც და ათის წლისა თუ იქნებოდა; გარეგნობით ავლაბრის კინტოსა ჰგავდა, ყარაჩოღული ტანისამოსი ეცვა: ბუხრის ქუდი, გულ გადახვეული მოკლე ახალუხი, პრტყელი, ერთი-

ანი ვერცხლის დიდი ქამარი, მინაოკებული ქუპნა ჩოხა, განიერი შარვალი, ჩაბალახი და ყელ ჩაკეცილი ჩუსტები.

აკაკის მოთხოვნის თანახმად ავაზაკს გატეხილი თავი და თვალ-წარბი შევეუხვეით, მერე თითონ მგოსნის თანდასწრებით გაულეთ წინაკარი და გაულეთ.

კარში გასვლის დროს ავაზაკმა დაიფიცა:

— „დედა შემერთოს ცოლად თუ დღეის იქით ქალაქში ჩემი ფეხი იქნეს და ან თუ ეს ფული მე მოვიხმარო“.

ცა მოწმენდილი იყო და განთიადის შუქი უკვე მოტანებული.


ჩვენ დავრჩით საშინლად აღელვებული, ძარღვები სიბრაზით გვიტოთოდა, აღარ ვიცოდით რა გვექნა, რომ ავაზაკი ხელიდგან გაულეთ და ვერც მისი მომსყიდველების სახელი და გვარი შევიტყეთ.

აკაკის წინადადებით ჩვენ გადავსწყვიტეთ და იქ დამსწრესაც ყველასა ესთხოვეთ, რომ ეს ამბავი საიდუმლოდ დაცულიყო და არავის გაგვეხმაურებინა, მაგრამ ვიმეორებ ამ ჟამად დადგა ისეთი დღე და წუთი, რომ ამ შემთხვევის კიდევ ბურუსში დატოვება შეუძლებელიდა და მეც ამიტომ დავარღვიე ფიცი და აღთქმა და გამოვამჟღავნე ამოდენა ხნის გულში დამარხული ეს საშინელი შემთხვევა.

სოსიკო მერკვილაძე



*
* *


 არობს უენით ქალი, კაცი,
 მწერი, ჩიტი, ირგვლივ ყველა,
 ნიავეც კი მოსისინე
 თავზედ დაგქრის ნელა-ნელა.
 გაფუჩქენილი ბუჩქის ძირას,
 გიაღერებს ნაზი ია
 და ბულბულიც მხიარულათ
 შემოგაძახის „ტია, ტია“!
 მგონის მღერას უერთდება
 სალამურის ხმა მკენესარე,
 და ამ ჰანგზე იფურჩქნება
 საქართველოს არე-მარე.
 დაჰლიღინებს ქვაბულიძე,
 მას ბანს აძლევს ბერი გელა
 და მუშებიც მათთან ერთად
 „მუმლი მუხას“, მღერის ყველა.

გიორგი ნუციძე



კრიტიკული ესკიზი



იკოლოზ ბარათაშვილი, ილია ჭავჭავაძე და აკაკი წერეთელი სამებაა, რომელიც წარმოადგენს ქართველი ერის სიწმინდეს, დიდებას, მშვენებას და სიამაყეს მეცხრამეტე საუკუნის განმავლობაში. სამივემ ქართული პოეზია ააყვავეს და ევროპის პოეზიას ამოუყენეს გვერდით. თუ ინგლისელები ამაყობენ ბაირონით, ჩვენ შეგვიძლია ვიამაყოთ ბარათაშვილით; თუ ფრანგები ამაყობენ ვიქტორ ჰუგოთი, ჩვენ შეგვიძლია ვიამაყოთ ილია ჭავჭავაძით; თუ რუსები ამაყობენ პუშკინით, ჩვენ შეგვიძლიან ვიამაყოთ აკაკი წერეთლით.

ის ერი, რომელსაც შეუძლია ერთ ხანაში ნიკოლოზ ბარათაშვილის, ილია ჭავჭავაძისა და აკაკი წერეთლის წარმოშობა, არ მოკვდება,—ამისთანა ერს დიდებული მომავალი აქვს.

აკაკი წერეთელი განხორციელებული პოეზიაა, ის ქართული ხელოვნების ჰენიოსია. მისი ლირიკა უკვდავია,—აქ მუსიკა და პოეზია ერთად არის შედღულღბული. აკაკი წერეთლის პოეზიაში თავმოყრილია მთელი ქართველი ერის სულის კვებება, ფიქრი, გრძნობა, მისწრაფება. აკაკი წერეთლის პოეზია—ეს ქართველი ერის ფიქრია, ქართველი ერის გრძნობა, ქართველი ერის მისწრაფება, მისი გულის ნადები. პოეტი, რომელიც ასე სრულათ, ასე ღრმათ გამოხატავს მთელი ერის სულსა და გულს, ქეშმარილათ ჰენიოსია.

აკაკი წერეთელმა პოეზიის ყოველ დარგს დააჩნია ძლიერი კვალი, მაგრამ შეუღარებელი, სწორუპოვარი და უკვდავი ის ლირიკაშია. აქ აკაკი წერეთელი თამამათ შეგვიძლია გვერდში ამოუყენოთ მსოფლიო ლირიკოსებს. გრძნობა სხვა არის, მისი გამოხატვა, გადმოცემა კი სულ სხვა. აკაკის ნიქის სიძლიერეც იმაში მდგომარეობს, რომ თავის გრძნობებისა და მათ

მიერ აღძრულ ფიქრებს პოეტი იმდენათ მკაფიოთ, ნათლათ და სრულათ გვიხატავს, რომ ჩვენც ვიმსჯელებით პოეტის ფიქრითა და გრძნობით.

აკაკი წერეთელი ეროვნული პოეტია. მისი პოეზია ქართველი ერის გულის ნადებია და სულის კვეთება. ის მუდამ ქართველ ხალხს, ქართულ ცხოვრებას, ქართველების ბედ-იღბალს დასტრიალებს თავს;—ამავე დროს აკაკის ლირიკა მსოფლიო ლირიკაა. აი ამაში მდგომარეობს აკაკის ნიჭის სიდიდე: ეროვნულს ნიადაგზე მან შექმნა მსოფლიო პოეზია.

პოეზიის გარეგანი სიმშვენიერე აკაკი წერეთელმა უმწვერვალესათ განავითარა; ამ მხრივ მან თითქმის საშუალოს მიაღწია და ჩვენს მწვერლობაში ხომ სწორი არა ჰყავს. როდესაც ჰკითხულობთ აკაკის ნაწერებს, მხოლოდ მაშინა გრძნობთ მეტის სიცხოვლით, თუ რა არის ქეშმარიტი პოეზია და რაში მდგომარეობს მისი სიმშვენიერე. გვონიათ, რომ ყოველი ადამიანი ისე უნდა ლაპარაკობდეს, როგორც აკაკი წერეთელი სწერს. მე არ ვიცი პოეტი, რომლის ნაწერებში რითმა იმდენათ ბუნებრივი და ძალდაუტანებელი იყოს, როგორც აკაკის პოეზიაშია.

როდესაც დაუკვირდებით იმ ენას, რომლითაც აკაკიზე აღრე სწერდენ და შეადარებთ მას აკაკის ენას, დაინახავთ ნათლათ, თუ რა დიდი ღვაწლი მიუძღვის აკაკის ქართული სალიტერატურო ენის წინაშე. თანაშეღრვე სამწერლო ენა აკაკი წერეთელმა შექმნა; მან გაამარტივა, გაამდაბიურა, გაამდიდრა, გაამშვენიერა ქართული ენა და ერთნაირათ ადვილათ გასაგები გახდა ის ყოველი ქართველი მკითხველისათვის. არ არსებობს ისეთი გრძნობა, ისეთი აზრი, ისეთი ფიქრი, რომლის მკაფიოთ გამოხატვა არ შეიძლებოდეს აკაკის ენით.

აკაკი წერეთელმა უკვდავი ჰყო ქართული პოეზია და ქართული ენა და ამით მან უკვდავი ჰყო თავისი თავი.

ივ. გომართელი



* * *

ქართველთ დიდებაე, სულ-მნათო,
 ვარსკვლავო, მზებრ სხივოსანო,
 ენა მეტყველო, გულადო,
 სწორ-უპოვარო, მგოსანო!

მივესალმები შენს კალამს
 და მადლით მოსილ მარჯვენას;
 თაყვანს ვცემ შენსა უებროს
 ზენაარ ნიჭიერებას.

მივესალმები შენს ჩანგის
 სიმთა საამო ქლერასა,—
 ქერივ-ობლის, ბედით ჩაგრულის
 გამამხნეველ მღერასა!

შეესტრფი, შეენატრი გულითა
 შენს დაუდეგარ შრომასა,
 ქართველთა გასაჭირშია
 მულამ დამცველად დგომასა.

შენის ლექსებით თანაბრად
 საზრდოობს დიდი, პატარა, —
 სალამს უძღენიან,—ვინც ქართველთ
 სეუ-ბედი ხელით ატარა...

დიდება შენსა მარჯვენას,
 კანდელო ჩაუქრობელო,
 ბნელეთში მყოფთა გუშავო,
 და სხივთა უხვად მფრქვეველო!

ღაბლო კატოძე

მ ო გ ო ნ ე ზ ა

—:—

იქნებოდი ასე 15—16 წლისა, როდესაც ძმებმა ჩამომიყვანეს ტფილისში და მიმცეს სამოქალაქო სასწავლებელში. 15—16 წელიწადი არც ისე ცოტაა, რომ ახალგაზრდამ არ იცოდეს თვის ვინაობა ეროვნების მხრივ, რომ ცოტათ, ბინდუნდაა მინც არ ჰხედავდეს მას, რაც ჰხდება მის გარშემო. მაგრამ მე მაგ მხრივ ძალიან უვიცი, თითქმის ბრმა ვიყავი; არ ვიცი, მე ვიყავ იმაში დამნაშავე, თუ ის გარემოება, ის ატმოსფერა, რომელშიაც მანამდისინ ვიმყოფებოდი — აბა რა უნდა გამეგო, რა მენახა, რა უნდა მეეხილა ჩემს თვალებს, როდესაც თელავმა და თელავის სამოქალაქო სასწავლებელმა, სადაც თბილისში ჩამოსვლამდისინ საბი წელიწადი დავყავი, კიდაობის და მუშტი-კრივის მეტი არა მასწავლეს-რა .. მაგრამ აქ დამნაშავე არც თელავია და არც მისი სასწავლებელი, დამნაშავე იყო დრო, „დრო მშვენიერი, მაგრამ ღწერთმა-კი დაგვიფაროს, რომ ისევ დაგვიბრუნდეს იგი“.

ღიად, დავიწყე სიარული ტფილისის სამოქალაქო სასწავლებელში. ერთ დღეს მეექვსე გაკვეთილი ქართული ენისა იყო; მეხუთე გაკვეთილის შემდეგ ავიღე წიგნები და შინ წასვლა დავაპირე. „სად მიდიხარ?“ — მკითხეს ამხანაგებმა — ქართველებმა — „შინ“ იყო ჩემი პასუხი. — ქართული ენის გაკვეთილი? — მერე, მე რა. — „ბიკო, შენ ქართველი არა ხარ?“ განციფრებით მომგარდნენ ქართველები აქეთ-იქიდან. — „რათა ვარ ქართველი“, მეწყინა კიდევ. — „ქართველი კი არა ვარ, თუში ვარ“!.. გაცეებით დამიწყეს ცქერა ამხანაგებმა. გავწიე შინისკენ. სანამ ეზოდან ქუჩაში გავდიოდი, დამეწია ერთი უფრო გონება გახსნილი ამხანაგი ქართველი და მიოხრა: ბიკო, დარჩი, დღეს მასწავლებელმა უნდა წაგვიკითხოს ახალი ქართული წიგნი, ამჟობენ ძალიან კარგიაო. კარგი მეთქი და დავრჩი. მეხუთე და მეექვსე განყო-

ფილების ქართული მოწაფეები შევიკრიფენით ერთ კლასში. დადგეს მალ-
ლათ კაფედრა. მოუთმენლად ველოდებოდით მასწავლებელს. აჰა, შემოვი-
და ბ. მ. ნ—ძე. სრული სიჩუმე ჩამოვარდა. მასწავლებელი ავიდა კაფედრა-
ზე, მიმოგვაგლო თვალი, ამოიღო უბის ჯიბიდან ახალი წიგნი, გადაშალა
და მკეხარე, აღფრთოვანებულის ხმით დაიწყო:

ვინ დასთვალოს ზღვაში ქვიშა
და ან ცაზე ვასკვლავები;
ვინ შეამკოს ღირსეულად
ქართველთ გმირთა მხარ-მკლავები...

დამახსოვდა ის სიამოვნების წუთები!.. როგორც მკრელი მახვილი, გა-
მიარეს ამ სიტყვებმა მანამდისინ ყრუ გულში... მთელი ჩემი არსებით სმე-
ნათ გარდავიქეცი. შემდეგ და შემდეგ გაღვიძებულმა გულმა თრთოლა და-
იწყო, ძარღვებში სისხლი აღუღდა და აჩქეფდა.

...სად ხარ, გამოდი, ნუ იმალები,
თუ რომ გულს გერჩის, ორბელიძეო?!

ამ ბრძოლის სურათს ვეღარ გაუძლო მთის გმირულ სიმღერებზედ და
გარდმოცემებზე აღწდილმა ქაბუკმა გულმა და, როდესაც ბრძოლის ველზე
უმხედრო ობელიძის ცხენის დანახვაზე თორნიკემ

ვეპ,—დაიყვირა, ამას არ უნდა ბევრი ფიცო,
საფრთხეში არის და განსაცდელში
ცხენოსანთ ჯარი, სწორეთ ვიცო!..

ყელში ამომებჯინა, მოკუმშულ მუშტებით ზეზე წამოვეარდი და ამ
დროს თვალებიდან დაბა-ღუბით ცრემლები წამომსკდა...

მასწავლებელმა გაათავა და ამხანაგების ხმაურობამ გამომიყვანა იმ

ტკბილ ოცნებებიდან, რომელშიაც სასოებით ვუმზერდი, ვით ცოცხალთ: ნინოს, თამარს და ქეთევანს; დიდებულ დაეითს, გულ-ლომს, ამასთან გულ-კეთილს და სათნოიან გმირს ორბელიძეს და ძველ არწივს—ეხლა წმიდა მამას თორნიკეს... ამ გმირთ აათროლეს პირველათ ჩემი გული და ჩააწვეთეს აღმაფართოვანებელი, მამულისადმი უკვდავი სიყვარული!..

ივ. ბუჭურაული

კ ო მ ო ნ



ელთ აიღებდა ფანდურსა,
დაჰკრავდა გულის სიმებსა,
ზედ დამღერებდა მწარე ხმებს
სევდიანს დასამძიმებსა.

გულ-ამოსკვნილი ტიროდა
უდროვით დასატირებსა;
უფრო ხმა-მალლა უხმობდა
თავის მომავალ გმირებსა...

გრდემლს სცემდა კვერს და უროსა,
უკვდავ კალამსა ჰკვერავდა,
ნაწრთობსა ნაკვერჩხალშია
შხამ-ნაღველითა ჰფერავდა.

როგორც ზღვა ფაფრ აყრილი
გულ-ზეიადურად ღელავდა,
როგორც ცა განრისხებული
სჭექდა, ჰჭუხდა და ელავდა.

ვით ლომი გულად დაცდილი
ყველას შიშს გვრიდა, ზარავდა;
ვით ამირანი ღმერთებსა
ცეცხლს გაუქრობელს ჰპარავდა,

რომ მოეტანა ქვეყანათა,
მთელი ხალხისთვის დაენტო
და შუქი მისი სიბნელის
დასათრგუნავათ გაენტო,

და აჰა, კიდევ აღსრულდა
წადილი მისი გულისა,
ცეცხლის გარშემო ტრიალებს
გრძნობა მის სიყვარულსა.

მოდით და დასთბით ამ ცეცხლით
ვინცა ხართ გასათბობელი;
ასე ენთება მუდამა
მზე—გული გაუქრობელი.

პოეტო, გული ეგ უენი
ზღვა არის დაუშრეტელი,
გიმზერთ და ესტკებით დღეის დღით
ყველა აქ უენი მკვრეტელი.

შ. მღვიმელი





* * *

ოდესაც ბავშვი შორს დაინახავს
საყვარელს მამას, დიდხანს არ ნა-
ხელს მისკენ იშვერს, იცინის, ღელავს, (ხუღს,—
გულით ეძლევა იგი სიხარულს.

მამა-მგოსანო! მირონ-ცხებული
ეგ შენი სახე მეცა მახარებს
და მეტის ღხენით აღვსილი გული
უსიტყვოთ მალზნებს და მამლეღვარებს!..

ი. მჭედლოშვილი






* *
* * *

სევ შენ ჰნათობ ერის ნუგეშათ,
შენი სახელი გარს ევლინება;
მამულიშვილო! შენი ჩანგთ ჟღერა
მკვდარს საფლავშიაც კი ეყურება!


მეც ავსდექ მკვდრეთით—გამომეფხიზლა...
მოველ შენს კარსა გიძღვნა სალამი
და ქართველთ ხალხის სადიდებელათ
მადლით გიკურთხოს ღმერთმა კალამი!

კ გულიაშვილი



გოგასიულის კოჟი

(ნაწყვეტი)


 დაბურს ხევში, ძველ ნანგრევთ შორის,
 მოსჩანს ეს ჩემი წმინდა ტაძარი,
 ნაშთი ამიერ განვლილთ წინაპართ,
 საფუძველ მტკიცე უზარ-მაზარი,
 გამოხვეული ხავსის ძაძებში,
 იმის მნახველთა გულ გასაგმირად
 და, ვით მწუხარე ჭირისუფალი,
 ჩაფიქრებული მდინარის პირად,
 თითქო მოსთქვამსო, რომ აქ ოდესმე
 ჰდუღდა სიცოცხლე თურმე განთქმული,
 ელფერ-შეცვლილი დროთა ბრუნვისგან,
 ბედის ქარ-ცეცხლში ჩამტკნარ-ჩანთქმული...
 მისი წარსული, თაფლ-ნაღვლით სავსე,
 მიზიდავს შორით აქ მომავალსა
 და ვეკითხები მას გულ ნატკენი,
 როცა მივაპყრობ გონების თვალსა:
 „აბა რას ფიქრობ, ჩემო ჭალარავ?
 „რათ მოგიხრია მსცოვანი თავი?
 „რისთვის ჩაგიცვამს შენ ეგ ძაძები,
 „წყლულის აღმძვრელი სულ შემხუთავი?..

„ნუ თუ მოგიკვდა მართლა პატრონი?
 „დაობლდი, ბეჩავ, ერთ ღროს ძლიერი
 „და შენს მიდამო ხეესაც მოესხა
 „ტურა-მელათა გროვა მშვიერი!

„მოიკალათა შენს დედა-გულში,
 „რაკი ერთხელვე შემოდგა ფეხი...
 „და, ვით თავხედი გიცი ქორწილში,
 „ალარ გშორდება ურცხვი, უკმეხი...

„ისმის დღე და ღამ მათი ჩხავილი...
 „მათი ბელადიც იქ, სერზედა ჰყეფს
 „და იმუქრება, რომ ევ ნადირი
 „აწ არხეინად იშენ-იბარტყებს...

„დიახ, მოხუცო, ვიცი რას ჩივი;
 „ეკ უხმო კენესა ჩემთვის ცხადია,
 „მაგრამ ცხადია ისიც, რომ ბედი
 „მიეთ-მოეთობს, ცვალებადია...

„დღეს ერთთანაა, ხვალ მეორესთან,
 „ზეგ სხვას მიაფრენს მეშვიდე ცამდე...
 „მაგრამ იცოდე, რომ ის არავის
 „არ შეაცხებება უკუნისამდე!..

„ადრე თუ გვიან, უკუ უღებება,
 „შეახებს თავისს უწყალო ხელსა
 „და შეაჩერებს მის აღმაფრენას,
 „რა განუმზადებს მას შხამ-ნაღველსა, —

„ისეთს, როვორიც შენ თვით იგემე,
 „როგორც სასჯელი თავ გადუვალი...
 „მაშ სხვაც ელოდეს, რომ გაიმეხებს
 „მოულოდნელათ დრო მამავალი,

„დრო, რის დადგება დღე განკითხვის
 „დაჰკრავს საათი თავზარდამცემ

„და შიშთილსა ჰყოფს ის, ვინც გლალატობს,
 „ვითა იუდა მოძღვრის გამცემი...

„გაიწმინდება შენი მიდამო,
 „დღეს ყოველ ქვემძრომთ ბინა-სამყოფი,
 „და განახლდები ისე ვით ნაშთი,
 „წმინდა მარჯვენის ნაზრომ-ნაცოფი...

„მას ნუ სთვლემ, გწამდეს, რომ აჰყვავდება
 „კელავ ეგ მამული, გოგასეულო,
 „უხმო მოწამე ჩენის ცხოვრების,
 „შავის ფიქრებით გარმოსეულო“!!.

იასონ წერეთელი

~*~*~*~



* * *

ასიქადულა მამულის შვილო,
ორმოც-და-ათ წლის, ქელო მუშაკო!
გრძობის ლამპარო ჩვენის ქვეყნისა,
ძალა არ შემწყვეს ღირხად შეგამყო!..

ქართველ ერს სულით დაობლებულსა
შენ მოველინე აწყობილ ჩანგით;
და ააქლერე, ზედ დაამლერე,
მგოსანო, ლექსი ციურის ჰანგით!

შენმა ლექსებმა ტანჯულ სამშობლოს
კვლავ მიაგონეს ქნარი რუსთველის;
კვლავ გაამხნევეს და ააძგერეს
მალაღის გრძობით გული ქართველის.

გზა ძნელი წინ გხვდა, შავი ბურუსით
იყო მოცული სამშობლო მზარე,
მაგრამ შენ მაინც მედგრად იბრძოდი,
ერთხელაც ქედი არ მოიხარე!

თუმცა-კი მოხუცი, კვლავ ლექსებს ტკბილსა
ხმა მძლავრად ჩანგზე გრძობით აძლერებ;
სამშობლოსადმი სიყვარულითა
ქართველების გულს აკენეს-აძგერებ.

ვაშა შენს შრომას, დიღო მგოსანო!
ერის დიდების გამოხმატველო!
შენით აღგზნილი, აღტაცებული,
ვაშას შეგძახის დღეს საქართველო!..


ქ. კვიციანიძე



ხისა სხივებით გარშემორტყმული
სდგას სამშობლოს წინ იგი უკვდავი,
ესაძირკვლება მას ქართველთ გული,
ცას უბჯენია ბუმბერაზს თავი!
ორფეოსისა ღვთიური ქნარი
ხელში უჭირავს მგოსანს მშვენიერს,
მისი სიმღერა ტკბილი, ნარნარი
თავსა ვეღება მრავალ ტანჯულ ერს,
მისი სიმღერა... სურნელოვანი
ია-ვარდისა თაიგულივით!
მისი სიმღერა... ჰაეროვანი
უკვდავ-უსაზღვრო სიყვარულივით!..
აი გაისმა ჰანგი სვედისა...
და ერი მწარედ მოსთქვამს და სტირის,
მწყველელ-მკრულავი თავის ბედისა
მგოსანთან ერთად ცხარე ცრემლსა ღვრის!..
მაგრამა აი ქნარმა გრძნეულმა
შეათამაზა ზვირთნი სიცილის
და გაიღიმა მწუხარე გულმა,
ერი იცინის... ტკბილად იცინის!..
ხან ბულბულივით ეშხით ჰგზნებული
მგოსანი შესტრფის ქალწულ სიყვარულს,
მისი მსმენელი—შეყვარებული
გულისა სატრფოს უძღენის თავის სულს...

და ხანაც ერი ძილს მიცემული
 ყურს მოჰკრავს ხოლმე საგმირო ძახილს,
 ფიცხლავ იღვიძებს ალტაცებული
 და ლესავს სამტროდ მრისხანე მახვილს!..
 დიდო მოხუცო! ივერთა სულის —
 ძვირფას საუნჯის შენა ხარ მცველი,
 მის კაეშანის, მის სიხარულის
 გამომცნობელი, გამომხატველი!
 მიტომც ჩვენ გულში დიად-ნათელი
 დგას შენი ძეგლი კლდეზე მაგარი,
 მას ვერ მოსპობენ ვერც მტრისა ხელი,
 ვერც თოვლი, წვიმა, ცეცხლი და ქარი!..
 გიკურთხოს ცაჲა ჰალარა თავი,
 მგოსანო, ტკბილო და საყვარელო,
 ვით საქართველომ შენ გყო უკვდავი,
 ისე უკვდავ ჰყავ შენ საქართველო.

ქ. მაყაშვილი



(ექსპრომტი)



მენა დამტკბარი, გრძნობა გამთბარი
განუშორებოდი ქვეყნიერებას,
და შეესტკეროდი ალტაცებული
თქვენს სახეს ღვთიურს, მშვენიერებას.

შეესჩერებოდი ბაგეს მღიმარეს
მუსიკურ სიტყვებთ წარმომშობელსა,
აზრებს საამოს, გულის წარმტაცსა
თქვენივე ნიჭთა შემამკობელსა.

ბევრგვარი იყო თქვენი თქმულობა,
ხან შურის ძებნა, და ხან წრფელობა,
ხან მოგონება სიჭაბუკისა,
ხან სიყვარული, მისგან ხელობა.

კელავაც მგოსანო ეგე ჭაღარა,
ნუ შეგაფერხებს, ძალა შენია,
გეტრფის ყმაწვილი, გეტრფის მოხუცი,
ქება-ღიდება შენ დაგშენია.

პასიკო ფორ.



* * *



იღება შენს ღვაწლს, ერის ლამპარო,
წყაროვ უშრეტო, უკდავებავ და სანეტარო, —
სიყრმით მოღვაწევე და სამშობლოს ამყვავებელი
გულის სიყრმიდგან, ჩანგის ტკბილათ ამყვლერებელი,

—
ვეტრფი შენს დროშას, დიდებულს წარწერილს,
ტანჯვებში ნაწრთობს, მტრის ლახვრით, ფრთა გაწეწილსა :
„მიყვარს სამშობლო, ერი დაობლებული,
მსურს აღვადგინო დაცემული, ვოსთვის ძგერს გული“.

—
აჰა, აყვავდა შრომა შენი ნაყოფიერი,
ღიად დროშის ქვეშ ალტაცებით შემოკრბა ერი ;
ირგვლივ გაისმის ხმა საამო, დამატკობელი,
ერთ ხმათ ლაღადებს ერი შენი, მიყვარს მშობელი ;

—
მძლავრი გუგუნნი არა სცხრება, სქექს და გრიალებს,
ზღვა ზვირთებს ისერის აშფოთებით ჰყეფავს, ღრიალებს,
სურს განანათლოს ბედი თვისი, მრავლათ ტანჯული
და დამსხვრიოს რითაც არის დღეს მიჯაჭული !

გიორგი ქიზიყელი

